

Siunnersuummut oqaaseqaatit

## Oqaaseqaatit nalinginnaasut

### 1. Aallaqqaasiut

2023-mi Inatsisartut upernaakkut ataatsimiinneranni aappaasup isertitai tunngavigalugit utoqqalinersiat naatsorsorneqarneranni nalimmassaasarunnaarneq pillugu Inatsisartut aalajangiiffigisassaattut siunnersuutit marluk (immikkoortut 64 aamma 120) saqqummiunneqarput.

Tamatumunnga atatillugu Naalakkersuisut allannguutissatut siunnersuummik saqqummiussipput, kingornalu utoqqalinersiaqarneq pillugu inatsisip allannguutissaatut siunnersuummik kingusinnerpaamik 2024-mi upernaakkut ataatsimiinnermi Naalakkersuisut saqqummiusseqqullugit peqquneqarlutik, taamaalilluni aappaasup isertitai tunngavigalugit utoqqalinersianik nalimmassaasarneq peerneqarluni.

Tamatuma saniatigut Naalakkersuisut aalajangerput, siusinaartumik pensionisiat ilanngullugit aappaasup isertitaanut attuumassuteqarunnaassasut kissaatigineqartoq.

Tamanna tunngavigalugu utoqqalinersiaqarneq pillugu Inatsisartut inatsisaata aamma siusinaartumik pensionisiat pillugit Inatsisartut inatsisaata Naalakkersuisut allannguutissaattut siunnersuummik matumanga suliaqarput, utoqqalinersianut siusinaartumillu pensionisianut naatsorsuinnermi aapparisaq isertitai attuumassutaarutsillugit.

### 2. Siunnersuummi immikkoortut pingaarnertit

Utoqqalinersialinnut utoqqalinersianut tapinik naatsorsuinnermi aappaasup isertitai siunnersuummi attuumassutaarutsinneqarput.

Taamaalilluni utoqqalinersiallip aapparisaata inooqataataluunniit isertitai utoqqalinersialinnut utoqqalinersianut tapinik naatsorsuinnermi sunniutaarutissapput. Tamatuma kingorna utoqqalinersianut tapinik naatsorsuineq utoqqalinersiallip nammineq isertitai kisiisa tunngavigalugit ingerlanneqartalissaaq, toqqammaviusumik aningaasartat assingalugit.

Taamaattorli utoqqalinersialinnut kisermaanut utoqqalinersianut tapit amerlanerpaaffiisa ukiumut 83.309 kr-it (2023-mi qaffasissuseq) aamma utoqqalinersialinnut aappalinnut utoqqalinersianut tapit amerlanerpaaffiisa ukiumut 46.307 kr-it (2023-mi qaffasissuseq) akornanni nikingassut siunnersuummi attatiinnarneqassaaq.

Taamaattumik utoqqalinersiallit kisermaat aamma utoqqalinersiallit aappallit utoqqalinersianut tapiisa annertussusaat nikingassuteqaannassaaq.

Taamaalilluni siunnersuummi naatsorsuinnermi taamatullu ikiorsiissutit annertussusaat utoqqalinersiallit aappaannut inooqataannulluunniit attuumassutaarutissapput, kisianni utoqqalinersialinnut kisermaanut aamma utoqqalinersialinnut aappalinnut annertunerpaaffissaannik akigitinneqartut allanngortinneqassanngillat.

Tamatuma saniatigut siunnersuut ilanngullugu kinguneqassaaq, siusinaartumik pensionisialik aappaqarpat inooqateqarpalluunniit isertitai siusinaartumik pensionisialinnut ikiorsiissutinik naatsorsuinnermi aamma ilanngunneqassanngitsut. Taamaalilluni siunnersuummi

naatsorsuinermi taamatullu ikiorsiissutit annertussusaat siusinaartumik pensionisiallit aappaqarsimappata inooqarteqarsimappataluunniit attuumassutaarutissapput.

### 3. Pisortani aningaasaqarnikkut allaffissornikkullu kingunerisassai

#### *Inuit kalluarneqartut amerlassusaat*

Naatsorsuutigineqarpoq siunnersuummit utoqqalinersiallit 4.144-t aappaminni najugaqateqartut aamma siusinaartumik pensionisiallit aappaminni najugaqateqartut 2.584-it kalluarneqassasut.

#### *Aningaasartuutaanerusut*

Tamanna kinguneqassaaq, aappaasup isertitaanik ilanngaassisarnerup atorunnaarsinneqarnera pissutigalugu utoqqalinersialinnut kalluarneqartunut toqqaannartumik 15,3 mio. kr-inik aningaasartuutaanerunissaat.

Tamatuma saniatigut aappaasup isertitaanik ilanngaassisarnerup atorunnaarsinneqarnera pissutigalugu siusinaartumik pensionisialinnut assinganik aningaasartuutaanerusut 16,8 mio. kr-inik amerlassuseqassapput.

Taamaalilluni siunnersuut pisortanut ukiumut aningaasartuutit katillugit (15,3 + 16,8) 32,1 mio. kr-inik saniatigut aningaasartuutaassapput.

#### *Aningaasartuutaanerusunit akileraartarneq*

Taamaattoq toqqaannartumik aningaasartuutaanerusut 32,1 mio. kr-it 42%-inik akileraaruserneqassapput. Taamaalilluni akileraarutitigut (32,1 x 0,42) 13,5 mio. kr-it utertinneqarlutik.

#### *Saniatigut sulinermik akileraartarneq*

Siunnersuut ukiumut suliffiusussat saniatigut katillugit 8,7-inik kinguneqassasoq naatsorsuutigineqarpoq, taakkununnga ukiumut akileraartarnikkut isertitat saniatigut 1,7 mio. kr-iussallutik.

#### *2024-miit siumullu pisortanut ukiumut aningaasartuutit katillugit*

Utoqqalinersianit siusinaartumillu pensionisianit aningaasartuutaanerusut (+)	+32,1 mio. kr-it ukiumut
Aningaasartuutaanerusunit akileraartarnikkut utertinneqartut (-)	- 13,5 mio. kr-it ukiumut
Ukiumut suliffiusussanit saniatigut akileraartarnikkut utertinneqartut (-)	- 1,7 mio. kr-it ukiumut
<b>Aningaasartuutit katillugit</b>	<b>16,9 mio. kr-it ukiumut</b>

Siunnersuutip kingunerissavaa, soorlu immikkoortoq 6-imi allaatigineqartoq, utoqqalinersiallit ilaasa utoqqalinersianut tapinik amerlanerusunit tunineqartalernissaat. Utoqqalinersianut aningaasartuutit kommuninit akilernerneqartarput, Nunatta Karsiata aningaasartuutit 90 %-ii utertittarlugit kommunillu 10%-ii sinneruttut nammineq akilertarlugit.

Tamakkiisumik oqimaaqatigiissitsinermik periutsip annertusisatut taaneqartartoq naapertorlugu nunatta karsiata kommunillu akornanni aningaasartuutit agguataarnerat eqqoqqissaartoq, siunnersuut manna pillugu, ataatsimoortumik tapiissutit pillugit isumaqatiginninniarnermi paasinarsiumaarpoq. Isumaqatiginninniarnerni ilaatigut

takuneqarsinnaassaaq, inatsisip allannguutaa tunngavigalugu kommunit akileraartarnikkut isertitaat amerlissasut.

#### **4. Inuussutissarsiortunut aningaasaqarnikkut allaffissornikkullu kingunerisassai**

Siunnersuut inuussutissarsiortunut aningaasaqarnikkut allaffissornikkullu kingunerisassaanik soqanngilaq.

#### **5. Avatangiisinut, pinngortitamut inuillu peqqissusaannut kingunerisassai**

Avatangiisinut, pinngortitamut inuillu peqqissusaannut kingunerisassaanik soqanngilaq.

#### **6. Innuttaasunut kingunerisassai**

Malittarisassat atuuttut malillugit utoqqalinersianut tapeq, utoqqalinersiallip aappaqarpallu isertitaannik maanna atuuttunik katillugit aningaasanut killiliussaq aalajangerneqartoq qaangerneqarpat, appartinneqassaaq. Utoqqalinersianik pensioninillu isertitat inunnut isumaginninnikkut isumannaallisaaneq pillugu Nunat Avannarliit Isumaqtatigiissutaat malillugu tunniunneqartartut naatsorsuinermi ilanngunneqassanngillat. Tamanna aamma siusinaartumik pensionisialinnut atuuppoq.

Siunnersuummi matumani utoqqalinersialinnut aappaqarsimappata isertitaat utoqqalinersianut tapimik aamma siusinaartumik pensionisialinnut toqqammaviumik aningaasartanik naatsorsuinermi ilanngunneqartarunnaassapput.

Taamaattumik ilaatigut makkunanga kinguneqassaaq:

##### *Utoqqalinersiallit marluk saniatigut isertitaqanngitsut*

Utoqqalinersialinnut aappaqartunut, aappaasooq aamma utoqqalinersialik saniatigulli isertitaqanngitsumut, siunnersuut sunniuteqarnaviannngilaq, aappaasup utoqqalinersiai ullumikkut utoqqalinersianut tapimik naatsorsuinermi ilanngunneqariinnginnerat eqqarsaatigalugu.

Taamaalillutik utoqqalinersialinnut marlunnut utoqqalinersialimmut aappalimmut ullumikkutut utoqqalinersianut tapeq tamakkiisooq qaammammut kr. 3.859-it (2023-mi qaffasissuseq) tunniunneqartassaaq.

##### *Utoqqalinersialinni marlunni minnerpaamik ataaseq saniatigut isertitaqartoq*

Utoqqalinersialinnut aappalinnut saniatigut isertitaqartunik, imatut paasillugu inuk utoqqalinersiami saniatigut aningaasarsiortoq, siunnersuut sunniuteqalaassaaq.

Aappaasup utoqqalinersiai ullumikkutut utoqqalinersiallip utoqqalinersiaanut utoqqalinersiat toqqammaviumut naatsorsuinermit ilanngunneqassanngillat. Malittarisassat atuuttut malillugit aappaasup sulinermit isertitai utoqqalinersialimmut utoqqalinersianut tapimik naatsorsuinermit ilanngunneqassapput.

Siunnersuut manna akuerineqarpat aappaasup utoqqalinersiat saniatigut isertitai utoqqalinersialimmut utoqqalinersianut tapimik naatsorsuinermit ilanngunneqartarunnaassapput, aamma tamatuma kingunerisaaq utoqqalinersialik utoqqalinersianut tapimik qaffasinnerusumik tunineqartalissaaq.

##### *Utoqqalinersiallip aappaa suliffeqartoq*

Utoqqalinersiallip aappaa suliffeqarpat, malittarisassat atuuttut malillugit aappaasup isertitai tamakkerlugit utoqqalinersialimmut utoqqalinersianut tapimik naatsorsuinermit ilanngunneqartussaapput. Aappaasup isertitai naammattumik qaffasissuseqarpata, allaat utoqqalinersianut tapeq tamaat unitsinneqarluni, siusinaartumik pensionisiat aamma

utoqqalinersiat inunnut isumaginninnikkut isumannaallisaaneq pillugu Nunat Avannarliit Isumaqatigiissutaat malillugu tunniunneqartartut ilanngunnagit, aappariit ukiumut isertitaannik maanna atuuttunik katillugit kr. 393.486-it (2023-imi qaffasissuseq) qaangerneqarpata.

Siunnersuut manna akuerineqarpat, aappaasup isertitai utoqqalinersialimmut utoqqalinersianut tapimik naatsorsuinermit ilanngunneqartarunnaassapput, aamma utoqqalinersialinnut aappalinnut saniatigut isertitaqanngitsunut tamanut utoqqalinersianut tapeq tamakkiisoq qaammammut kr. 3.859-it (2023-mi qaffasissuseq) tunniunneqartalissaq.

#### *Siusinaartumik pensionisiallit*

Qulaani allanneqartut ilanngullugu siusinaartumik pensionisiallip pensionisiaanik naatsorsuinermit atuutissapput, assigiinngissutaallunili, siusinaartumik qaffasinnerpaamik pensionisialik tamatigut siusinaartumik qaffasinnerpaamik pensionisiat minnerpaamik affaanik toqqammaviusumik aningaasartaanik pisinnaatitaassammatt, aappaasup isertitai katillugit qanorluunniit amerlassuseqaralarpata apeqqutaatinnagit.

Taamaalilluni pensionisiallit, pensionisianik pisinnaatitaanngitsunik aappaqarpata, siunnersuut malillugu iluaquserneqarnerpaasussaapput. Tamanna aappariinnut qaffasinnerpaamik isertitaqartunut ilanngullugu malunnaateqarnerpaassaaq.

Ataatsimut isigalugu eqimattat isertitakitsut ullumikkutut inissisimaannassapput, eqimattallu akunnattumik isertitaqartut qaffaaffigineqarnerat akunnattumiissalluni.

#### **7. Kingunerisassat allat taasariaqartut**

Siunnersuut allanik taasariaqartunik kingunerisassanik soqanngilaq.

#### **8. Oqartussanik kattuffinnillu il.il. tusarniaaneq**

Siunnersuut piffissami 6. juli 2023-miit 28. juli 2023-mut Naalakkersuisut tusarniaanermut nittartagaanni [www.naalakkersuisut.gl](http://www.naalakkersuisut.gl) tamanut saqqummiunneqarpoq, piffissamilu tassani tusarniaanermi illuatungeriinnut arlalinnut tusarniaassutigineqarluni. Tusarniaaneq tusarniaanermilu akissutit pillugit ilanngussaq 2 innersuussutigineqarpoq.

**Siunnersuummi aalajangersakkanut ataasiakkaanut oqaaseqaatit***§ 1-imut*

## Nr. 1-imut

Aalajangersakkami § 5, imm. 2, atorunnaassasoq aalajangerneqarpoq, utoqqalinersiallip utoqqalinersianut tapiinut, toqqammaviusumik aningaasartat assigalugit, aapparispap isertitaaniit attuumassuteqarunnaarsinneqassammat.

§ 5, imm. 3 tamatuma kingorna § 5, imm. 2-nngussaaq.

## Nr. 2-mut

§ 10, imm. 2-mi utoqqalinersianut tapeq imm. 1 malillugu utoqqalinersiallip kissermaap ukiumut isertitai maanna atuuttut kr. 156.000-t utoqqalinersialillu aappaqartup ukiumut isertitai maanna atuuttut kr. 183.000-t qaangerpatigit appartinneqassasoq aalajangerneqarpoq. Taamaattoq utoqqalinersiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunneqanngillat.

*§ 2-mut*

## Nr. 1-imut

§ 15, imm. 3-mi aalajangerneqarpoq, siusinaartumik pensionisiat tunniunneqartut isertitanut killigititaq sorleq atorlugu appartinneqassasut. Siusinaartumik pensionisiat, siusinaartumik pensionisiallip ukiumut isertitai maanna atuuttut katillugit, siusinaartumik pensionisiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunnagit, appartinneqassapput kr. 38.000-t qaangerpatigit.

## Nr. 2-mut

§ 16, imm. 3-mi aalajangerneqarpoq, siusinaartumik pensionisiat tunniunneqartut isertitanut killigititaq sorleq atorlugu ilanngaaserneqassasoq. Siusinaartumik pensionisiat, siusinaartumik pensionisiallip ukiumut isertitai maanna atuuttut katillugit, siusinaartumik pensionisiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunnagit, appartinneqassapput kr. 38.000-t qaangerpatigit.

## Nr. 3-mut

§ 17, imm. 3 aalajangerneqarpoq, siusinaartumik pensionisiat tunniunneqartut isertitanut killigititaq sorleq atorlugu ilanngaaserneqassasoq. Siusinaartumik pensionisiat, siusinaartumik pensionisiallip ukiumut isertitai maanna atuuttut katillugit, siusinaartumik pensionisiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunnagit, appartinneqassapput kr. 38.000-t qaangerpatigit.

## Nr. 4-mut

Aalajangersakkami aalajangerneqarpoq, § 17, imm. 4, atorunnaarsinneqartooq, siusinaartumik pensionisiat aappaasup isertitaanit attuumassutaarutsinneqarmata.

*§ 3-mut*

Aalangersakkami aalangerneqarpoq Inatsisartut inatsisaat atuutilissasoq ulloq 1. januar 2024.

## Ilanngussaq 1

<b>Siunnersuut inatsimmut atuuttumut naleqqiullugu</b>	
<i>Oqaasertai atuuttut</i>	<i>Inatsisissatut siunnersuut</i>
	<b>§ 1</b>  Utoqqalinersiaqarneq pillugu Inatsisartut inatsisaanni, tak. Namminersorlutik Oqartussat inatsimmik nalunaarutaat nr. 42, 14. september 2023-meersoq, tulliuttut allanngortinneqassapput:
<i>Imm. 2.</i> Utoqqalinersiaqartut utoqqalinersiaqanngitsumik aappaqartut utoqqalinersianut tapeqassapput utoqqalinersialimmut kisimiittumut tunniunneqartumut annertussuseqartumik, utoqqalinersiaqartoq aapparisaatalu isertitaat maanna atuuttut ukiumut katillugit kr. 300.000-t ataallugit isertitaqarpata, utoqqalinersiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunnagit. Utoqqalinersianut tapeq utoqqalinersiallip aappaatalu isertitaanit toqqammavigineqartunit 51 pct-imik appartinneqassaaq kr. 183.000-nik ilanngaaserlugit.	<b>1.</b> § 5, imm. 2, atorunnaarsinneqarpoq.  Imm. 3 tamatuma kingorna imm. 2-nngussaaq.
<i>Imm. 2.</i> Toqqammaviusumik tapeq ilanngunnagu, aamma Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat naapertorlugu siusinaartumik pensionisiallit utoqqalinersiallillu ilanngunnagit, utoqqalinersianut tapeq ilanngaateqassaaq utoqqalinersiaqartup aappaqarpallu ukiumut isertitai maanna atuuttut katillugit ukunannga qaangiisimappata: 1) Utoqqalinersiaqartumut kisimiittumut kr. 156.000. 2) Utoqqalinersiaqartumut aappaqartumut kr. 183.000, tak. § 5.	<b>2.</b> § 10, imm. 2, ima oqaasertalerneqassaaq: ” Imm. 2. Utoqqalinersianut tapeq, utoqqalinersiallip ukiumut isertitai maanna atuuttut katillugit, utoqqalinersiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunnagit, appartinneqassaaq makkua qaangerpatigit: 1) utoqqalinersialimmut kisermaamut kr. 156.000-t. 2) utoqqalinersialimmut aappaqartumut kr. 183.000-t, tak. § 5.”
	<b>§ 2</b>  Siusinaartumik pensionisiat pillugit Inatsisartut inatsisaanni, tak. Namminersorlutik Oqartussat inatsimmik

	nalunaarutaat nr. 41, 14. september 2023-meersoq, tulliuttut allanngortinneqassapput:
<p><i>Imm. 3.</i> Siusinaartumik sulisinnaajunnaarnersiuteqarnermi pisartakkat appartinneqassapput, siusinaartumik sulisinnaajunnaarnersiuteqartoq aammalu taassuma aapparisaata ukiumoortumik isertitarisaat, tamatumani ilanngunnagit siusinaartumik sulisinnaajunnaarnersiutit, utoqqalinermi pensionisiat aammalu Nunani Avannarliit akornanni isumaginninnikkut Isumaqatigiissut naapertorlugu 38.000 kr.-it sinnerpatigit ilanngullugit § 17, imm. 2 naapertorlugu siusinaartumik sulisinnaajunnaarnersiutit annertunerpaat affaatut tunniunneqartartut. Aapparisaqarsimagaanni taassuma isertitai siulliit 100.000 kr.-it ilanngunneqassanngillat.</p>	<p><b>1.</b> § 15, imm. 3, ima oqaasertalerneqassaaq:  “ <i>Imm. 3.</i> Siusinaartumik pensionisiat, siusinaartumik pensionisiallip ukiumut isertitai maanna atuuttut katillugit, siusinaartumik pensionisiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunnagit, appartinneqassapput kr. 38.000-it qaangerpatigit, § 17, imm. 2 malillugu siusinaartumik qaffasinnerpaamik pensionisiat affaanik ilallugit.”</p>
<p><i>Imm. 3.</i> Siusinaartumik sulisinnaajunnaarnersiutit appartinneqassapput siusinaartumik sulisinnaajunnaarnersiuteqartoq aammalu taassuma aapparisaata ukiumoortumik isertitai, tamatumani ilanngunnagit siusinaartumik sulisinnaajunnaarnersiutit, utoqqalinermi pensionisiat aammalu Nunani Avannarliit akornanni isumaginninnikkut Isumaqatigiissut naapertorlugu 38.000 kr.-it sinnerpagit ilanngullugit § 17, imm. 2 naapertorlugu siusinaartumik sulisinnaajunnaarnersiutit annertunerpaat pingasorarterutaatut tunniunneqartartut. Aapparisaqarsimagaanni taassuma isertitai siulliit 100.000 kr.-it ilanngunneqassanngillat.</p>	<p><b>2.</b> § 16, imm. 3, ima oqaasertalerneqassaaq:  “ <i>Imm. 3.</i> Siusinaartumik pensionisiat, siusinaartumik pensionisiallip ukiumut isertitai maanna atuuttut katillugit, siusinaartumik pensionisiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunnagit, appartinneqassapput kr. 38.000-it qaangerpatigit, § 17, imm. 2 malillugu siusinaartumik qaffasinnerpaamik pensionisiat pingasorarterutaannik ilallugit.”</p>
<p><i>Imm. 3.</i> Siusinaartumik pensionisiat apparneqassapput siusinaartumik pensionisiaqartoq aappaqarpallu taassuma aappaata ukiumut ataatsimut piffissami pineqartumi isertitait siusinaartumik pensionisiat, utoqqalinerisiat aamma pensionisiat Nunani Avannarlerni isumaginninnikkut sillimmasiisarnernik aaqquissuussinerit naapertorlugit 38.000 kr.-it qaangersimagaangatigit. Aappaqaraanni aapparisaq isertitaani 100.000 kr.-it siulliit ilanngullugit naatsorsuunneqassanngillat.</p>	<p><b>3.</b> § 17, imm. 3, ima oqaasertalerneqassaaq:  “ <i>Imm. 3.</i> Siusinaartumik pensionisiat, siusinaartumik pensionisiallip ukiumut isertitai maanna atuuttut katillugit, siusinaartumik pensionisiat aamma pensionisiat inunnut isumaginninnikkut isumannaallisaaneq pillugu Nunat Avannarliit isumaqatigiissutaat malillugu tunniunneqartartut ilanngunnagit, appartinneqassapput kr. 38.000-it qaangerpatigit.</p>



<p><i>Imm. 4.</i> §17, imm. 2 naapertorlugu, siusinaartumik pensionisiallit pisinnaatitaapput tunngaviusumik pensionisiani qaffasinnerpaamik siusinaartumik pensionit 50 %-iinik pisassallutik, aappaqarsimagunik aapparisaata piffissami pineqartumi tamakkiisumik isertitariunnagaasa annertussusii apequtaatinnagit. § 17, imm. 2 naapertorlugu, tunngaviusumik pensionisiat appartinneqassapput, siusinaartumik pensionisiallip ukiumut tamarmiusunik piffissami pineqartumi isertitaasa, siusinaartumik pensionisiat, utoqqalinersiat pensionisiallu Inunnut Isumaginninnikkut isumannaallisaaneq pillugu Nunat Avannarliit isumaqatigiissutaat malillugu akiliutigineqarsimasut, ilanngunnagit, 38.000 kr.-t, qaffasinnerpaamik pensionisiat 50 %-ii ilanngullugit, sinnerpatigit. § 15 imm. 4. Naapertorlugu, § 17, imm. 6 atorneqassanngilaq, appartitsisoqassaaq appasinnerpaamik siusinaartumik pensionisianut aningaasanut killiliussat assingi malillugit.</p> <p><i>Imm. 5.</i> Siusinaartumik pensionisiallip sulisinnaassusia nalilersuiffigineqaqqissaaq, pineqartup pensionisiat saniatigut 80.000 kr.-ninik isertitaqarsimassappat. Qaffasinnerpaamik pensionisiaqarnera allanngortinneqassanngilaq pineqartup sulisinnaassusianik nalilersuiffigineqarnerani.</p> <p><i>Imm. 6.</i> §§ 20 aamma 21-ni taaneqartut qaffasinnerpaamik pensionisiat 100 %-imik appartinneqassapput, isertitatigut toqqammaviusut 38.000 kr.-inik ilanngarlugit qaffasinnerusimassappata.</p>	<p><b>4.</b> § 17, imm. 4, atorunnaarsinneqarpoq.</p> <p>Imm. 5-6 tamatuma kingorna imm. 4-5-inngussapput.</p>
	<p style="text-align: center;"><b>§ 3</b></p> <p>Inatsisartut inatsisaat manna atuutilissaaq ulloq 1. januar 2024.</p>

**Ilanngussaq 2****Siunnersuut pillugu: Utoqqalinersiaqarneq pillugu Inatsisartut inatsisaata aamma siusinaartumik pensionisiat pillugit Inatsisartut inatsisaata allanngortinneqarneri pillugit Inatsisartut inatsisaat pillugu tusarniaanermut akissutitut allakkiaq.**

Siunnersuut piffissami 6. juli 2023-miit 28. juli 2023-mut tusarniaassutigineqarpoq.

Tamatuma saniatigut siunnersuut tusarniaanermut nittartakkami [www.naalakkersuisut.gl](http://www.naalakkersuisut.gl)-imi tamanut saqqummiunneqarpoq.

**Aallaqqaasiut:**

Tusarniaanermi akissutit oqaaseqaatinik siunnersuutip imaanut tunngassuteqartunik imaqartut tamakkerlugit allanneqarput, aamma naalakkersuisoqarfiup akissutai naqinnerit uingasut atorlugit allanneqarlutik. Tusarniaanermut akissutini, teknikkimut tunngassutilinnik oqaaseqaatinik kiisalu oqaatsitigut kukkunerit amigaataasullu pillugit imaqartut, annertunerusumik oqaaseqaateqarfiginagit siunnersuummi iluarsineqarput.

**Siunnersuut tusarniaassutigalugu makkununga nassiunneqarpoq:**

Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq, Kommune Kujalleq,

Isumaginninnermi Naammagittaalliuuteqartarfik, Inuit Pisinnaatitaaffii pillugit Siunnersuisoqatigiit (IPS), Inuttut pisinnaatitaaffinnut Institutti, Naligiissitaanissamut Siunnersuisoqatigiit, Meeqqat pillugit Oqaaseqartartoq MIO, Tilioq/Inuit Innarluutillit pillugit Oqaaseqartartoq, Utoqqaat pillugit Oqaaseqartartoq,

Kalaallit Meerartaat, MIBB (Meeqqat Inuunerissut), Sorlak, INOOQAT/Nunatsinni Inuit Innarluutillit Kattuffiat, ISI - Kalaallit Nunaanni tappiisut isigiarsuttullu peqatigiiffiat, KTK (Kalaallit Nunaanni tusilartut kattuffiat), Landsforeningen Autisme, Kalaallit Nunaat, Kattuffik Utoqqaat Nipaat, Angajoqqaatigiit (Meeqqanik ADHD-qartunik aamma/imaluunniit autismeqartunik angajoqqaat peqatigiiffiat), Pissassarfik – Nuna Tamakkerlugu Inunnut innarluutilinnut Sullissivik, Neriuffik Kattuffiat, KNIPK (Kalaallit Nunaanni Innarluutillit Piginnaanikitsut Kattuffiat), Sugisaq (Tarnikkut eqqarsartaatsikkullu napparsimasut ilaquataasullu peqatigiiffiat), Kalaallit Røde Korsiat,

Sulisitsisut, SIK (Suliatigut peqatigiiffiit Kattuffiat), KNAPK (Kalaallit Nunaanni Aalisartut Piniartullu Kattuffiat),

Kalaallit Illuutaat Aarhus, Kalaallit Illuutaat Odense, Kalaallit Illuutaat Aalborg, Kalaallit Illuutaat København.

**Tusarniaanermi akissutinik makkua nassiussippot:**

Kommune Qeqertalik, Kommuneqarfik Sermersooq, Utoqqaat pillugit Oqaaseqartartoq, Inuit Pisinnaatitaaffii pillugit Siunnersuisoqatigiit (IPS), SIK, Sulisitsisut aamma Qeqqata Kommunia.

**Makkua oqaaseqaateqanngillat:**

Sulisitsisut aamma Utoqqaat pillugit Oqaaseqartartoq.

**Tusarniaaneq pillugu oqaaseqaatit aallarniutaasut**

Siunnersuut qulaani allanneqartutut tamanut tusarniaassutigineqarpoq piffissami 6. juli 2023 – 28. juli 2023. Siunnersuummi tusarniaassutigineqartumi utoqqalinersiallit pillugit aalajangersakkanut tunngasuinnaat imarai (siunnersuummi § 1).

2024-mut Aningaasanut inatsit isumaqatiginninniutigineqarneranut atatillugu isumaqatigiissutaavoq, siusinaartumik pensionisiallit siunnersuummut ilanngunneqarnissaat kissaatigineqartoq, taamaattumik aalajangersakkat siusinaartumik pensionisialinnut tunngasut saniatigut ilanngunneqarlutik (siunnersuummi § 2).

Siunnersuut inaarutaasumik isikkoqartillugu piffissaq eqqarsaatigalugu tamanut tusarniaassutigeqqinneqanngilaq.

Taamaattoq kommunit tamarmik ataatsimeeqatigineqarput, siunnersuut aalajangersakkat siusinaartumik pensionisialinnut tunngasut ilanngullugit UKA2023-mut saqqummiunneqassasoq kommunit isumaqataallutik, kommuninut aningaasaqarnikkut annaasaqaataassanngippat.

### **Tusarniaanermi akissut:**

#### **1. Kommune Qeqertalik**

**Siunnersuut uunga: Utoqqalinersiaqarneq pillugu Inatsisartut inatsisaannik allannguneq pillugu Inatsisartut inatsisaat pillugu tusarniaanermut akissuteqaat (Utoqqalinersialinnut pilersuisussaaqatigiinnerup atorunnaarsinneqarnera)**

Kommune Qeqertalik matumuuna Siunnersuut uunga: Utoqqalinersiaqarneq pillugu Inatsisartut inatsisaannik allannguneq pillugu Inatsisartut inatsisaat pillugu tusarniaanermut akissuteqaat (Utoqqalinersialinnut pilersuisussaaqatigiinnerup atorunnaarsinneqarnera) pillugu tusarniaanermut 6. juli 2023-meersumut oqaaseqaatinik akissuteqarpoq.

Tusarniaanermut piffissaliussap iluani inatsisissatut siunnersuutip tusarniaassutigineranut akissutip kommunalbestyrelsimi imaluunniit ataatsimiititaliami suliarissallugu periarfissaqarsimanngilaq, taamaattumik ataani allaqqasut allaffissornikkut akissutitut isigineqassapput.

#### **Ataatsimut isigalugu:**

Siunnersuut uunga: Utoqqalinersiaqarneq pillugu Inatsisartut inatsisaannik allannguneq pillugu Inatsisartut inatsisaat pillugu oqaaseqarnissamut Kommune Qeqertalik qujassuteqarpoq.

Kommune Qeqertalik isumaqarpoq sinnersuutip utoqqalinersiaqarneq pillugu allaffissorneq oqilisaaffigissagaa, utoqqalinersiallit aappaqartunut, ukiup ingerlanerani nikerartumik isertitalinnut, tunngatillugu. Siunnersuutip kingunerisaanik kommuni aapparisaq isertitai eqqarsaatigisarunnaassavai taamaalillunilu utoqqalineri allip utoqqalinersia ukiumut arlaleriarlugit nalimmassarnissaat pisariaarutissalluni. Taamaalilluni utoqqalinersialik qaammatip tulliani utoqqalinersiami qanoq amerlatiginissaat qularutigisarunnaassavaa. Sullissisut akissarsialeriviullu sulinerat ilanngullugu annikillissaaq kommunimilu innuttaasunut allanut sulianik suliaqarnermut atorneqarsinnaalissalluni.

Atuutilerfissatut ulluanut atatillugu qulakkeertariaqarpoq, kommunit aqqissuussaminnik piffissaagallartillugu naleqqussaassinnaanissaat, kiisalu ineriartortitsinermut qaavatigut suliamut aamma malittarisassanut nutaanut aningaasaqarnikkut taarsiiffigineqartariaqarlutik. Utoqqalinersiaqarneq siuumoortumik tunniunneqartarmat, januaarimut utoqqalinersiat decembarip aallartinnerani naatsorsuineq aallartinneqartarpoq, taamaalilluni utoqqalinersiat decembarimi ulluinnarmi kingullermi tunniunneqarnissaat piareeqqasarluni. Tamanna isumaqarpoq, inatsisit nutaat malillugit december 2023-mi kommunit aqqissuussaata piareeqqasariaqartut.

Tamatúmunga atatillugu oqaatigissallugu pingaaruteqarpoq, isumaginninnermi ikiorsiissutit atuuttut pillugit kaajallaasitaq 1. januar 2024-meertussa q piffissaagallartillugu nassiunneqartariaqartoq, taamaalilluni utoqqalinersiat aningaasartaat 1. januar atuutilertussat kommunip aqqissuussaani decembarip aallartinnerani suliarineqarsinnaanngorlugit. Ukiuni kingullerni kaajallaasitaq piffissaq kingulleq atorlugu nassiunneqartarpoq, tamatumalu kinguneraa kommuni piffissaq eqqorlugu utoqqalinersiat tunniunnissaannik ajornartorsiuteqartarmat januaarimilu aningaasartat nalimmassartariaqartarlugit imaluunniit sapaatip akunnerata naanerani sulisussanik aggersaasariaqartarluni piffissaq eqqorlugu nalimmassaaniarneq anguniarlugu.

Taamaattumik kommunip sakkortuumik kajumissaarutigissavaa, isumaginninnermi ikiorsiissutit atuuttut pillugit kaajallaasitaq siunissami siusinnerusukkut nassiunneqartarnissaa, ajornanngippat sapinngisamik septemberip naalernerani. Tamatumunga kaajallaasitaq suliarineranut pingaaruteqassappat, aamma atuutilernissaata ulluanut atatillugu eqqarsaatigisariaqarpoq.

*Akissut: Oqaaseqaat tusaatissatut tiguneqarpoq, aningaasartat pillugit kaajallaasitaq paasissutissat pisariaqartut pissarsiarineqarpata pissutissaqanngitsumik kinguarsarnagu nassiunneqarnissaa naalackersuisoqarfiup isumagissavaa. Tamatuma kingorna naalackersuisoqarfiup isumagissavaa, siunnersuutip saqqummiunneqarneranut atatillugu inatsisissatut siunnersuummut nassuiaateqarnissaq kommuninut immikkut allakkatut nassiunneqassasoq.*

## **Siunnersuummi aalajangersakkanut ataasiakkaanut oqaaseqaatit**

### **§ 1-imut tunngatillugu**

Inatsisissatut siunnersuutip qallunaatuani imatut allaqqavoq:

*Imm. 3 kingorna imm. 2-nngorpoq.*

Inatsisissatut siunnersuutip kalaallisuuani amigaataavoq imm. 3.

Kalaallisuuani oqaaseqaatini imm. 3-p allannortinneranut innersuussuteqanngilaq. Ilanngassaq 1-imili tamanna eqqortumik allaqqalluni.

*Akissut: Ilanngullugu suliarineqarpoq, kukkuneq iluarsineqarluni.*

### **§ 2-mut tunngatillugu**

Siunnersuutigineqarpoq inatsit atuutilissasoq ulloq 1. december 2023-mi imaluunniit saqqummiunneqarnerata kingorna aamma siunnersuummi § 1 ulloq 1. januar 2024 aallarnerfigalugu sunniuteqassasoq aalajangersagaqassasoq siunnersuutigineqarluni. Siunnersuummut matumunnga tunngavilersuutaavoq, kommunit januarimi utoqqalinersiat pillugit decemberimi naatsorsuereertarmata aalajangeereertarlutillu. Utoqqalinersiat decemberimi ulluinnarmi kingullermi tunniunneqartarput. Inatsit aatsaat ulloq 1. januar 2024-mi atuutilerpat, inatsit nutaaq malillugu naatsorsuinissaq pillugu aalajangiinissamut aamma utoqqalinersiat tunniunnissaannut kommunit januar 2024 sioqqullugu inatsisitigut tunngavissaqanngillat, inatsimmi sulii atuutilinngimmat.

*Akissut: Ilanngullugu suliarineqanngilaq. Aningaasartanut assingisaannullu allannguinerit pillugit siunnersuutit ukiup ninnerani atuutilersinneqartarneri nalinginnaasumik suliariaatsitut isigineqarpoq. Naalackersuisoqarfiup ilanngullugu naliliiffigaa, inatsisip saqqummiunneqarnerata kinguninngua naatsorsuinerit pisariaqartut ingerlannissaannut aamma 2024-mut utoqqalinersianik naatsorsuinissamut aalajangiinerit pisariaqartut pillugit kommunit inatsisitigut tunngavissaqartut.*

## **2. Kommuneqarfik Sermersooq**

Kommuneqarfik Sermersuup utoqqalinersialinnut pilersuisussaaqatigiinnerup atorunnaarsinneqarnissaa aamma amerlanerusunik sulisussaqaalernissamut atatillugu kingunerisassaani naatsorsuutigineqartut ajunngitsutut isigai.

Kommuneqarfik Sermersuup maluginiarpaq, utoqqalinersiutinik amerlanerusunik tunniussisalernissami kommunit amerlanerusunik aningaasartuuteqaalernissaat ilanngullugu naatsorsorneqanngitsoq.

Taamaattumik Kommuneqarfik Sermersuup naatsorsuutigaa, ataatsimoortumik tapiissutit pillugit isumaqatiginninniarnissani tamakku eqqarsaatigineqarumaartut.

*Akissut: Tamakkiisumik oqimaaqatigiissitsinermik periutsip annertusisatut taaneqartartoq naapertorlugu nunatta karsiata kommunillu akornanni aningaasartuutit agguataarnerat eqqoqqissaartoq, siunnersuut manna pillugu, ataatsimoortumik tapiissutit pillugit isumaqatiginninniarnermi paasinarsiumaarpooq. Isumaqatiginninniarnerni ilaatigut takuneqarsinnaassaaq, inatsisip allannguutaa tunngavigalugu kommunit akileraartarnikkut isertitaat amerlissasut. Ileqqorissaarnissaq pillugu pissuseq tamanna siunnersuummut nalinginnaasumik oqaaseqaatini immikkoortumi 3-mi "2024-miit siumullu Pisortanut ukiumut aningaasartuutit katillugit" ilanngullugu nassuiaaffigineqarpoq.*

## **3. Inuit Pisinnaatitaaffii pillugit Siunnersuisoqatigiit**

Inuit Pisinnaatitaaffii pillugit Siunnersuisoqatigiit (IPS) utoqqalinersiaqarneq pillugit Inatsisartut inatsisaannik allannguneq pillugu Inatsisartut inatsisissaattu siunnersuut pillugu tusarniaaneq ulloq 6. juli 2023-mi tiguaa. IPS periarfissamut tamatumunnga qujassuteqarpoq makkunangalu oqaaseqaateqarluni:

Siunnersuummi aamma siunnersuummut oqaaseqaatini nalinginnaasuni takuneqarsinnaavoq, utoqqalinersialinnut, utoqqalinersialinnut kisermaanut utoqqalinersiamik taamaallaat isertitaqartunut naleqqiullugit aningaasaqarnikkut atugarissaarneroreersunut, iluaqutaassasoq.

IPS-imut tupinnarpoq inatsisissatut siunnersuummik eqimattanut pissakinnerusunut, eqimattat mianernarnerpaat inuuniarnikkut atugarisaasa pitsanngorsaaviginissaat siunertaralugu, iluaqutaanissaa sooq salliutinneqannginnersoq.

*Akissut: Ilanngullugu suliarineqanngilaq, utoqqalinersianut tapinik naatsorsuinermi aappaasup sunniuteqarnera siunnersuummi kisimi pineqarmat, utoqqalinersianullu tapit aningaasartarpiaannut toqqaannartumik allannguinermit tunngassuteqanngimmat.*

*Siunnersuummi taamaallaat siunertaavoq utoqqalinersiallit tamarmik utoqqalinersianut tapinik pisinnaatitaanissaasa qulakkeerneqarnissaat, namminneq isertitatik tunngavigalugit pisinnaatitaaffigalugit aamma aappaasup isertitaanut attuumassutaarullugit, ullumikkut toqqammaviumik utoqqalinersianut atuutereersut assingalugit.*

*Allannguut utoqqalinersiallit, utoqqalinersialinnut kisermaanut utoqqalinersianik taamaallaat isertitaqartunut naleqqiullugit aningaasaqarnikkut pitsaanagerusumik inissisimasunut pingaarnertut iluaqutaanerussasoq tamatuminnnga malitsigisaanik kingunerisaavoq, taamaattumillu tamanna siunnersuummut oqaaseqaatini unneqqarissumik allanneqarluni.*

## **5. SIK**

**Utoqqalinersiaqarneq pillugu inatsisartut inatsisaata allanngortinneqarnissaa pillugu siunnersuummut oqaatigumasat.**

Taamatut aappaasut isertitaat aallaavigalugu utoqqalinersiat milliartortinneqartarnerisa atorunnaarsinneqarnissaat SIK-miik ajorinngilluinnarparput, tamannalu pissusissamisoorluinnartutut isigaarput.

Ilami taamatut aappaasut isertitaat aallaavigalugu utoqqalinersiat millilerneqaraangata ilaatigut nungungajallugit aappaasoq utoqqalinersiaqartoq, ukiuni 40-50-ini sulereersoq qinnuuloortunngortinneqartarnera akuersaarneqarsinnaanngilluinnarmat. Taamaattumik allannguutissatut siunnersuutigineqartoq 100 procentimik SIK-miik taparserparput.

*Akissut: Oqaaseqaammut naalakkersuisoqarfik qujassuteqarpoq.*

Naak uani tusarniaassummi ilaanngikkaluartoq oqaaseqaat ima ilalaarusupparput. Isumaqarpugut ullumikkut utoqqalinersiat annikippallaartut, aammalu saniatigut isertitaqartarnissaq qaffanneqartariaqartoq, makkua peqqutigalugit:

Siullermik Nunatsinni utoqqalinersiaqartut Danmarkimut sanilliullugit annerusumik akilerartinneqartarput, aammalu inummut ilanngaataat Danmarkmi utoqqalinersiuteqartunut sanilliuggu annikinnerusarluni, taamaattumik saniatigut isertitaqarsinnaanermnut killissarititaasoq isumaqarpugut qaffanneqariaqartoq.

Aappaattut maannakkut sumiiffiit ilaanni sulisussaaleqivugut, taamaattumillu saniatigut isertitaqarsinnaanermut killissarititaasoq qaffanneqaraluarpat isumaqartta utoqqalinersiuteqaraluarluni saniatigut sulerusunnermut annertuumik kajumissaataassasoq.

Taamaattumik saniatigut isertitaqarsinaanermut qummut killiussaq qaffanneqarniarli.

Pingajuattut maannakkut SISA-mut katersisut apeqqusiisalerput soq katersissanerlutik, nalunagu SISA-miik pisartagaqalerunik utoqqalinersiassaminnik ilanngartuiffigineqartalertussaallutik.

SISA pilersinneqarpoq utoqqartatta atugarissaarnerulernissaat siunertaralugu, tamannalu siunertaq ajunngilluinnarpoq. SISA-lli piunera ”inuusuppoq” katersallu suli akunnallutik, tassa ima annertuginatik kisiisa suli inuussutigineqarsinnaallutik.

*Akissut: Oqaaseqaatit tusaatissatut tiguneqarput aammalu utoqqarnut inatsisitigut aaqqissuusseqinnissamut nalilersuinermi ilaatinneqarumaarlutik.*

## 5. Qeqqata Kommunia

Tusarniaanermut akissut 14. juli 2023-meersoq (allakkat normuat 2300062):

Qeqqata Kommunia "Uunga siunnersuut: Utoqqalinersiat pillugit Inatsisartut inatsisaannik allanngineq pillugu Inatsisartut inatsisaat" oqaaseqaateqarsinnaanermt qujassuteqarpoq. Siusinaartumik pensionisiat pillugit Inatsisartut inatsisaata allanngortinneqarnissaa pillugu Inatsisartut inatsisaat.

Qeqqata Kommuniata siullertut sakkortunerpaamik Naalakkersuisut kajumissaarniarpai Kommunit Naalakkersuisullu tusarniaanermut killiliussat kingusinnerpaamillu akissutissanut isumaqatigiissutaat maleqqullugu.

*Akissut: KANUKOKA-p aamma Naalakkersuisut akornanni isumaqatigiissut taamaatinneqarnerata kingorna, tamanut ammasumik tusarniaanermut killiliussaq najoqqutassiaasoq kisimi ullummikkut atuummat.*

*Tusarniaanermi piffissaq sapaatip akunnerinut pingasunut sivikillineqarnissaa pisariaqarmat, Naalakkersuisoqarfimmi siunnersuut pillugu kommunit tallimat tamarmik ilisimatitsissutitut ataatsimiinnissamut aggersarneqarput.*

Qeqqata Kommunia utoqqalinersiat pillugit Inatsisartut inatsisaannik allanguinissamut tunngatillugu akerliliissutissaqanngilaq. Inatsimmik allannguinissamut siunnersuut pillugu kommuni tapersiimmat oqaatigineqassaaq, tassani inatsimmi tunngavigineqartumi inooqatigisamit tunngaveqartumik nalimmassaarinnissamik saqqummiussisoqarnissaa Naalakkersuisut peerusullugu kissaatigigaat.

Ilutigitilluguli allannguutit Kommuninut Aningaasaqarnikkut kinguneqarsinnaanerat erseqqissaatigalugu tassungalu attuumatillugu qinnuiginnilluni ataatsimut tapiissutit pillugit isumaqatiginninniarnissami immikkoortoq qaqinneqassasoq, taamaalilluni utoqqalinersianik tunniussinermt immikkut aningaasartuteqarnermt taartisiassanik takkuttoqarsinnaaniassammat.

*Akissut: Tamakkiisumik oqimaaqatigiissitsinermik periutsip annertusisatut taaneqartartoq naapertorlugu nunatta karsiata kommunillu akornanni aningaasartuutit agguataarnerat eqqoqqissaartoq, siunnersuut manna pillugu, ataatsimoortumik tapiissutit pillugit*

*isumaqatiginninniarnermi paasinarsiumaarpog. Isumaqatiginninniarnerni ilaatigut takuneqarsinnaassaaq, inatsisip allannguutaa tunngavigalugu kommunit akileraartarnikkut isertitaat amerlissasut. Ileqqorissaarnissaq pillugu pissuseq tamanna siunnersuummut nalinginnaasumik oqaaseqaatini immikkoortumi 3-mi ”2024-miit siumullu Pisortanut ukiumut aningaasartuutit katillugit” ilanngullugu nassuiaaffigineqarpoq.*

Tusarniaanermi akissuteqaat 2023-mi aggustip arfineq-aappaani Atugarissaarnermut ataatsimiititaliami politikkikkut suliarineqarpoq.

Tusarniaanermut akissuteqaat 14. juli 2023-meersumut ilassuteqaat 15. juli 2023-meersoq: Qeqqata Kommunia "Uunga siunnersuut: Utoqqalinersiat pillugit Inatsisartut inatsisaannik allannguneq pillugu Inatsisartut inatsisaat" oqaaseqaateqarsinnaanermut qujassuteqarpoq. Siusinaartumik pensionisiat pillugit Inatsisartut inatsisaata allanngortinneqarnissaa pillugu Inatsisartut inatsisaat. Matumani utoqqalinersiat pillugit tusarniaanermut aallaqqaammut inatsimmik allanngunermit siusinaartumik pensionisianut aammattaaq atuuttusaanera ilanngunneqarsimanginnera pillugu isumaginninnermut, Suliffeqarnermut Nunamullu Namminermut Naalakkersuisoqarfimminngaanniit allaffeqarfik 10. august 2023 aggersarneqarnikuulluni.

Utoqqalinersiat pillugit Inatsisartut inatsissaannik allannguinissamut tunngatillugu aammalu inatsisissatut siunnersuut siusinaartumik pensionisialinnut atuuttusaaneranut Qeqqata Kommunia akerliliissutissaqanngilaq. Inatsimmik allannguinissamut siunnersuut pillugu kommuni tapersiimmat oqaatigineqassaaq, tassani inatsimmi tunngavigineqartumi inooqatigisamit tunngaveqartumik nalimmassaarinnissamik saqqummiussisoqarnissaa Naalakkersuisut peerusullugu kissaatigalugu.

Utoqqalinersiat pillugit allannguisoqarnissaa pillugu siunnersuummut tusarniaanermi akissuteqaammik Qeqqata Kommuniata nassiunnikuusaani pissutsit sinneri allakkani normoqartuni 2300062 atuutiinnarput.

Tusarniaanermut akissuteqaat Aningaasaqarnermut ataatsimiititaliap nalinginnaasumik ataatsimiinnerani ulloq 15. august 2023 kiisalu mail atorlugu Atugarissaarnermut ataatsimiititaliamut paasissutissiissutigineqarpoq tassani inatsimmut allanngunermit tunngatillugu siusinaartumik pensionisiallit aamma isiginiarneqassasut tamanit isumaqataaffigineqarluni.

*Akissut: Ilassuteqaat nassiunneqartumi oqaaseqaatinut naalakkersuisoqarfik qujassuteqarpoq.*